



18. agustusi 2021

UKA 2021/85

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunat tamalaat akornanni aningaasaliisussanut pilerinarsaanissamut atatillugu Tasersiarmi erngup nukinganik nukissiorfiliortoqarnissaata avammut ussassaarutiginissaanut aalajangersimasumik pilersaarummut periusissiortoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarut kingusinnerpaamik UKA2022-mi saqqummiunneqassaaq.

(Inatsisartunut ilaasortaq Siverth K. Heilmann, Atassut)

Tunngavilersuut

Nunatsinni tatsit pigisatta anginersaasa ilagaat Tasersiaq angissuseq aallaavigalugu erngup nukinganik nukissiorfiliornissamut periarfissaqaqisoq, aammalu qutsissumi inissismarnga tunngavagalugu periarfissaqarluarluni.

Nunatsinni sapingisaq tamaat nukissiornikkut pilersitsinermi minguitsitsiniarneq kissaatigalugu tamatta sikisaarluta isumaqataaffigisinnavaarput. Pingaarnersiugassatulli aamma sallitutitassaqarpugut, matumanii sinerissami illoqarfiiit allat ataavartumik nukissiutinik pilersuinermi atuinngitsut pilersorneqarnissaat aamma qulakkiigassaralugu.

Suliniuit taakku annertuut soorunami aningaasarpassuarnik naleqartussaapput, taamaakkaluartorli nunatsinni pinngortitamik paarsinissatsinnut kiisalu aamma siunissaq ungasinnerusooq eqqarsaatigalugu imminut akilersinnaanerunera aamma isumaqatigiissutigisinnavaarput.

Tasersiarmi periarfissaasut illoqarfiiit pilersorneqarnissaanut kisimi tunngangillat, taassumalli saniatigut nukissiorfiit nunat tamalaat akornanni suliniutinut pilerinarsaanikkut atorneqarsinnaallutik. Matumanii eqqartorneqarpoq aatsitassiorfinnut suliffeqarfissuit nunatta karsianut annertuumik isaatisisinnasut. Taakku aatsitassiorfiit nukissiortinnik annertuunik pisariaqartitsiffiupput.

Taamaanngippat aamma namminerisamik nunat tamalaat akornanni aningaasaliisussanut pilerinarsasoqarsinnaavoq, taakkulu paasissutissanik tigooraavinnik pilersitsisinnaallutik. Paasissutissanik katersuiffiit paasissutissanik annertuunik tigumminnittuusarput, taakkulu nittartakkakkut, oqarasuaatinut angallattakkanut aamma immiussorneqarsinnaasarlutik. Nunat tamalaat akornanni suliffeqarfiiit annertuut avatangiisitsinnut nillataartumut annertuumillu



nukissiornikkut periarfissaqarneranut soqutiginninnissaasa ilimanaateqarnera annertuvoq. Tamannalu aamma annertuumik aningaasaqarnikkut iluanaaruteqarsinnaaffiulluarsinnaavoq.

Tamanna pillugu periarfissap annertoqisup avammut nunat tamalaat akornanni aningaasaliisinnasunut ussassaarutiginissaanut aalajangersimasumik pilersaarummut periusissiortoqarnissaanik Naalakkersuisut peqquneqarnissaat kissaatigaarpuit.

Pisortanut aningaasatigut allaffissornikkullu kingunerisassai:

Avataaniit aningaasaliisussanut nittarsaassinissamut pilersaarusiortoqarnissaanut aningaasartuutissat A/C ukiumut aningaasarsiassaanit 500.000 koruuniusunit annertunerunissaat naatsorsuutigineqanngilaq.

Inuussutissarsiortunut namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.